

Iklan kerja kosong dalam talian naik kepada 159,148

BERITA HARIAN (1/6/2022) Page 5

Wilayah Persekutuan KL rekod jumlah kekosongan jawatan tertinggi

Oleh Saadiyah Ismail
saadiyah_ismail@bh.com.my

Kuala Lumpur: Tawaran kekosongan jawatan yang diiklankan dalam talian sepanjang suku pertama tahun ini didapati melonjak kepada 159,148 atau 76.4 peratus berbanding tempoh sama 2021.

Ketua Perangkawan Malaysia, Datuk Seri Dr Mohd Uzir Mahidin, berkata berdasarkan penawaran jawatan kosong mengikut negeri pada suku pertama 2022, Wilayah Persekutuan Kuala Lumpur merekodkan jumlah kekosongan pekerjaan tertinggi pada 42.7 peratus diikuti Selangor (16.9 peratus), Johor (7.3 peratus), Pulau Pinang (3.9 peratus)

dan Melaka (1.7 peratus).

Katanya, Februari mencatatkan iklan tertinggi iaitu 67,172 kekosongan, manakala Januari dan Mac, masing-masing 48,924 dan 43,052 kekosongan.

“Sebahagian besar majikan memerlukan pekerja dalam kategori profesional (44.9 peratus) diikuti juruteknik dan profesional bersekutu (17.7 peratus) dan pengurus (11.3 peratus).

“Mengikut susunan, lima pekerjaan paling popular ditawarkan dalam tempoh rujukan adalah profesional pengiklanan dan pemasaran, profesional bersekutu pentadbiran, pengarah urusan dan ketua eksekutif, akauntan dan juruaudit dan pembangun perisian,” katanya menerusi kenyataan media semalam.

Data itu diperoleh menerusi Analisis Data Raya Job Market Insights dan My Job Profile: Lanskap Penawaran Pekerjaan di

Malaysia, bagi suku pertama 2022 yang dijalankan oleh Jabatan Perangkaan Malaysia (DOSM).

Jelasnya, dari perspektif ekonomi pula, sektor perdagangan borong dan runcit, pembaikan kenderaan bermotor dan motosikal menjadi sektor utama yang menyumbang kepada penawaran pekerjaan bagi pencari kerja pada suku pertama 2022.

“Empat lagi sektor dengan penawaran pekerjaan tertinggi adalah sektor pembuatan; aktiviti profesional, teknikal dan saintifik; aktiviti kewangan dan insuran takaful serta aktiviti penginapan dan perkhidmatan makanan dan minuman.

“Analisis terhadap jumlah kekosongan jawatan diiklankan dalam talian pada suku pertama 2022 secara keseluruhannya menunjukkan ekonomi masih dalam tempoh pemulihan selaras dengan peralihan fasa pandemik kepada endemik.

“Dengan peralihan fasa ini, semua sektor ekonomi dan lapangan negara dibuka secara berperingkat dan diharapkan dapat mengurangkan impak pandemik, memulihkan ekonomi negara dan seterusnya mencipta lebih banyak peluang pekerjaan untuk diisi pencari kerja,” katanya.

Sementara itu, bagi mendapatkan maklumat lanjut, pencari kerja boleh mendapatkan perincian mengenai penawaran pekerjaan diiklankan dalam talian di www.dosm.gov.my/bda-jmi dan myjobprofile.dosm.gov.my.

Dalam pada itu, DOSM sedang menjalankan Survei Pendapatan, Perbelanjaan Isi Rumah dan Kemudahan Asas (HIES/BA) 2022 bermula dari 1 Januari sehingga 31 Disember 2022 dan Survei Ekonomi Tahunan 2022 (AES 2022) bermula 15 April sehingga 30 September 2022.

DOSM amat menghargai kerjasama daripada responden yang terpilih untuk memberikan maklumat kepada DOSM serta menjayakan survei ini. Sila layari www.dosm.gov.my untuk maklumat lanjut.



Mohd Uzir Mahidin